


Los ntawm Thawj Tswj Hwm
Thomas S. Monson



Cov Yaj Saub uas Coj Peb Kev

Ob peb xyos tas los lawm, kuv zaum hauv chav ntawm lub Tuam Tsev Salt Lake uas Thawj Pawg Thawj Tswj Hwm thiab Pawg Kaum Ob tug Thwj Tim sib ntsib txhua lub lim tiam. Kuv twb ntsia phab ntsa uas nyob ntawm Thawj Pawg Thawj Tswj Hwm saib, thiab nyob ntawd kuv pom daim duab ntawm txhua tus Thawj Tswj Hwm ntawm lub Koom Txoos.

Thaum kuv ntsia lawv, cov uas nyob ua ntej kuv—txij ntawm tus Yaj Saub Yauxej Xamiv (1805–44) mus txog Thawj Tswj Hwm Gordon B. Hinckley (1910–2008)—ua rau kuv xav hais tias, “Kuv ris txhua tus txiaj vim lawv tau coj kuv kev.”

Cov neeg no yeej yog txiv neej zoo uas yeej tsis tau hloov siab, tsis tau ntshai, thiab yeej tsis tau tso tseg. Cov no yog cov txiv neej ntawm Vajtswv. Thaum kuv xav txog cov yaj saub hauv lub caij nyooog kawg no uas kuv paub thiab hlub heev, kuv xav txog lawv lub neej, lawv tej cwj pwm, thiab lawv tej lus qhia uas txais los ntawm kev tshoov siab.

Thawj Tswj Hwm Heber J. Grant (1856–1945) yog tus Thawj Tswj Hwm ntawm lub Koom Txoos thaum kuv yug los. Thaum kuv xav txog nws lub neej thiab tej lus qhia, kuv ntseeg tias ib tug cwj pwm uas Thawj Tswj Hwm Grant coj yam ntxwv txog yog kev tiv tiag tiag—kev tiv tiag tiag ua tej yam uas zoo thiab tseem ceeb.

Thawj Tswj Hwm George Albert Smith (1870–1951) yog tus Thawj Tswj Hwm ntawm lub Koom Txoos thaum lub sij hawm uas kuv yog tus npisov ntawm kuv pawg

ntseeg hauv Salt Lake City. Nws pom tias tus Tswv thiab tus yeeb ncuab yeej sib tawm tsam zoo li nkawd sib rub hlua. Nws qhia tias, “Yog nej yuav nyob raww tus Tswv tog, ces nej yuav txais nws lub hwj huam thiab yuav tsis xav ua txhaum hlo li.”¹

Thawj Tswj Hwm David O. McKay (1873–1970) yog tus uas hu kuv ua ib tug mej zeej hauv Pawg Kaum Ob tug Thwj Tim thaum xyoo 1963. Nws qhia kom neeg xav txog lwm tus los ntawm nws txoj kev ua nws lub neej. Nws hais tias, “Kev ntseeg Khetos tiag tiag yog kev hlub lwm tus.”²

Thawj Tswj Hwm Joseph Fielding Smith (1876–1972), ib tug uas sau ntawv ntau heev nyob hauv lub Koom Txoos, muaj ib lub ntsiab cai uas tau coj nws lub neej uas yog kev kawm txog txoj moo zoo. Nws tau nyeem vaj lug kub tsis tu tsis tseg thiab paub txog tej lus qhia thiab tej lus qhuab qhia nyob hauv cov ntawv vaj lug kub ntau tshaj txhua tus uas kuv paub.

Thawj Tswj Hwm Harold B. Lee (1899–1973) yog kuv ceg txheem ntseeg tus thawj tswj hwm thaum kuv yog ib tug tub hluas. Ib yam uas nws pheej nyiam hais yog “Sawv hauv tej qhov chaw dawb huv, thiab tsis txav li.”³ Nws yaum kom Tsoom Haiv Neeg Ntseeg mloog zoo, thiab ua raws li, tus Vaj Ntsuj Plig Dawb Huv tej lus ntxhi.

Kuv ntseeg tias ib lub ntsiab cai uas coj Thawj Tswj Hwm Spencer W. Kimball (1895–1985) lub neej yog kev rau siab. Nws yeej rau siab ntso rau tus Tswv tag nrho. Nws kuj rau siab ua neej raws li txoj moo zoo.

Thaum Thawj Tswj Hwm Ezra Taft Benson (1899–1994) los ua tus Thawj Tswj Hwm ntawm lub Koom Txoos, nws hu kuv ua nws tus Pab Cuam thib Ob hauv Thawj Pawg Thawj Tswj Hwm. Kev hlub yog lub ntsiab cai uas coj nws kev, uas yeej nyob hauv kab lus uas nws nyiam tshaj, uas tus Cawm Seej tau hais tias: “Nej yuav tsum ua neeg zoo li cas? Kuv hais rau nej tseeb tias, zoo tib yam li kuv.”⁴

Thawj Tswj Hwm Howard W. Hunter (1907–95) yog ib tug uas pheej nrhiav qhov zoo nyob hauv lwm tus. Nws yeej ua siab zoo; nws yeej txo hwj chim. Kuv tau koob hmoov vim kuv yog nws tus Pab Cuam thib Ob.

Thawj Tswj Hwm Gordon B. Hinckley qhia kom peb ua zoo npaum li peb ua tau. Nws tau ua tim khawv txog tus Cawm Seej thiab Nws ntiag tug hauj lwm. Nws muaj kev hlub qhia peb. Qhov uas kuv ua nws tus Pab Cuam thib Ib yeej yog lub sam xeeb thiab ib txoj koob hmoov rau kuv.

Tus Cawm Seej txib cov yaj saub los vim Nws hlub peb. Thaum lub tuam rooj sab laj lub Kaum Hli Ntuj no, cov Tuam Thawj Coj ntawm lub Koom Txoos yuav rov qab muaj cib fim qhia txog tus Cawm Seej tej lus. Peb txo hwj chim thiab saib kev lav ris no tseem ceeb heev.

Peb tau koob hmoov ntau vim Yexus Khetos lub Koom Txoos uas tau muab txum tim rov qab los nyob hauv lub ntiag teb thiab lub Koom Txoos muaj lub hauv paus uas yog lub pob zeb ntawm kev tshwm sim. Kev tshwm sim uas tsis tu tsis tseg yeej yog qhov uas ua rau Yexus Khetos txoj moo zoo muaj zog.

Thov kom peb yuav npaj siab txais kev tshwm sim rau peb tus kheej uas los nplua mias nyob hauv lub tuam rooj sab laj. Thov kom peb yuav mob siab tsa tes txhawb nqa cov yaj saub thiab cov thwj tim uas muaj txoj sia nyob. Thov kom peb yuav txais kev kaj, kev txhawb nqa, kev nplij siab, thiab kev dag zog thaum peb mloog lawv tej zaj lus. Thiab thov kom peb yuav rov qab cog lus rau tus Tswv Yexus Khetos—Nws txoj moo zoo thiab Nws txoj hauj lwm—thiab rau siab ua neej raws li nws tej lus txib thiab ua raws li Nws lub siab nyiam.

LUS CIM

1. *Teachings of Presidents of the Church: George Albert Smith* (2011), 191.
2. *Teachings of Presidents of the Church: David O. McKay* (2003), 181.
3. Lus Qhuab Qhia thiab Kev Khi Lus 87:8.
4. 3 Nifais 27:27.

QHIA LOS NTAWM TSAB XOY NO

Thawj Tswj Hwm Monson qhia tej zaj tseem ceeb heev uas nws tau kawm los ntawm cov uas yog yaj saub ua ntej nws. Nws kuj qhia peb nco ntsoov tias “tus Cawm Seej xa cov yaj saub los vim Nws hlub peb.” Thaum koj mus txhawb pab cov uas koj mus qhia, tej zaum koj yuav xav sib tham txog qhov uas vim li cas cov yaj saub thiab cov thwj tim qhia tias Vajtswv hlub peb. Cia li xav seb puas xav qhia Thawj Tswj Hwm Monson tej lus qhuab ntuas los ntawm ib zaj hauv tej lub tuam rooj sab laj dhau los. Cia li caw cov uas koj qhia kom npaj rau lub tuam rooj sab laj thaum koj nrog lawv rov qab xav txog tej zaj uas tau tshoov lawv lub siab thiab pab lawv hnov tus Cawm Seej txoj kev hlub.

COV HLUAS

Ua Vajtswv Tsaug Vim Peb Muaj Ib tug Yaj Saub

Peb tus yaj saub, Thawj Tswj Hwm Thomas S. Monson, tau pab koj li cas? Koj yuav nco dab tsi zoo tshaj txog nws? Cia li xav seb puas xav sau rau hauv koj phau ceev xwm txheej txog Thawj Tswj Hwm thiab nws lub neej—ib yam li nyob hauv zaj no nws piav txog txhua tus yaj saub txoj kev pab uas nws nco ntsoov.

Tej zaum koj kuj yuav xav xaiv ib kab lus uas nws hais thiab sau rau ib qho chaw uas koj yuav pom ntau, xws li ib hnab tso ntawv rau koj txoj kev kawm ntawv los yog ib daim ntawv nyob hauv koj chav. Tej zaum koj yuav xav siv kab lus ntawd ua ib daim duab thiab tso rau tus xov tooj! Txhua zaus koj pom kab lus ntawd, tej zaum koj yuav xav txog qhov uas peb muaj ib tug yaj saub niaj hnub nim no tseem ceeb npaum li cas thiab nco ntsoov tias nws nyob no kom hlub thiab coj peb txoj hau kev.

Koj download tau cov nkauj rau zaj “We Thank Thee, O God, for a Prophet” nyob ntawm [lds.org/go/9176](https://www.lds.org/go/9176).

COV ME NYUAM

Cov Yaj Saub Coj Peb Los Cuag Khetos

Tus Cawm Seej muab cov yaj saub rau peb vim Nws hlub peb. Qhov uas peb coj raws li cov yaj saub pab peb xaiv qhov yog. Koj ua tau ob yam dab tsi kom coj raws li tus yaj saub?



Ua Ib Siab

Ua tib zoo thov Vajtswv kawm tej yam no thiab nrhiav kev tshoov siab seb koj yuav tsum qhia dab tsi. Qhov uas Vajtswv cov ntxhais to taub lub hom phiav ntawm lub Koom Haum Niam Tsev yuav npaj lawv li cas kom txais tau cov koob hmoov ntawm txoj sia nyob mus ib txhis?

**Kev Ntseeg Tsev Neeg
Kev Pab**

Thiab tus Tswv hu nws cov neeg ua Xi-oos, vim lawv koom siab koom ntsws, thiab ua raws li kev ncaj ncees; thiab tsis muaj cov neeg pluag (saib Mauxes 7:18). Peb yuav ua li cas kom ua ib lub siab?

Txwj Laug M. Russell Ballard ntawm Pawg Kaum Ob tug Thwj Tim hais tias: “Lub ntsiab tseem ceeb ntawm lo lus Akiv *atonement*, uas txhais tias kev theej txhoy yog lo lus *one* uas txhais tias ib. Yog tias txhua leej txhua tus to taub qhov no, yeej yuav tsis muaj leej twg uas peb tsis quav ntsej, tsis hais lawv laus li cas, yog haiv neeg twg, poj niam txiv neej, ntseeg dab tsi, los sis muaj koob muaj npe npaum li cas los. Peb yuav sim coj tus Cawm Seej tus yam ntxwv thiab yeej yuav tsis ua siab phem, saib tsis taus lwm tus, los yog hem lwm tus.”¹

Thawj Tswj Hwm Henry B. Eyring, tus Pab Cuam hauv Thawj Pawg Thawj Tswj Hwm, qhia hais tias: “Thaum tib neeg muaj tus Ntsuj Plig nrog lawv nyob, [lawv] yeej yuav ntseeg tias yuav muaj kev sib haum

xeeb. . . . Vajtswv tus Ntsuj Plig yeej tsis ua rau tib neeg sib cav sib ceg (saib 3 Nifais 11:29). . . . Ua rau yus nyob kaj siab lug thiab xav koom siab koom ntsws nrog lwm tus.”²

Hais txog tej kev tsis sib haum nyob hauv tsev neeg, Carole M. Stephens, uas yog tus Pab Cuam thib ib hauv Koom Haum Niam Tsev Pawg Tuam Thawj Tswj Hwm, hais tias: “Kuv yeej tsis tau nyiaj ntxeem kev sib nrauj, kev mob uas muaj thaum yus niam yus txiv tso yus tseg, los sis kev lav ris uas muaj thaum yus yog ib tug niam tsev uas tsis muaj tus txiv. Kuv tsis tau muaj ib tug me nyuam tuag, tsis tau raug kev muaj tsis taus me nyuam, los yog kev poj niam nyiam poj niam. Kuv tsis tau raug ntaus, raug mob ntev heev, los yog raug kev muaj yeas. Tej kev sim siab no tsis yog kuv li.

“. . . Tiam sis dhau los ntawm *kuv* tej kev sim siab . . . ua rau kuv paub tus uas to taub tiag tiag. . . . Thiab tsis tas li ntawd, kuv tau raug txhua yam kev sim siab uas kuv tau hais txog thaum kuv ua ib tug ntxhais,

ib tug niam, niam pog, viv ncaus, phauj, thiab phooj ywg.

“Peb uas yog cov ntxhais uas ua raws li Vajtswv tej kev khi lus muaj cib fim kawm tau los ntawm peb tej kev sim siab; thiab peb kuj muaj cib fim koom siab muaj kev khuv leej thaum peb txhawb nqa lwm tus hauv Vajtswv tsev neeg, raws li peb tau khi lus tseg.”³

Vaj Lug Kub thiab tej Ntaub Ntawv Xov Xwm Ntxiv

Yauhas 17:20–23; Efexus 4:15; Mauxiyas 18:21–22; 4 Nifais 1:15; reliefsociety.lds.org

LUS CIM

1. M. Russell Ballard, “The Atonement and the Value of One Soul,” *Liahona*, Tsib Hlis Ntuj 2004, 86.
2. Henry B. Eyring, “That We May Be One,” *Ensign*, Tsib Hlis Ntuj 1998, 67.
3. Carole M. Stephens, “Peb Tsev Neeg Los ntawm Vajtswv Los,” *Liahona*, Tsib Hlis Ntuj 2015, 11–12.

Xav Txog Qhov No

Qhov uas peb ib leeg koom siab nrog ib leeg yuav pab peb li cas kom koom siab nrog Vajtswv?